

南潯志卷四

里人周慶雲纂

河渠

潯溪 宋談鑰吳興志云潯溪在烏程縣東七十二里有水自

德清嘉興來與震澤鷓脰湖接焉明一統志云潯溪自運河

東流與震澤鷓脰湖相接今德清諸水自南來運河自西來

北入太湖東入鷓脰湖然則運河及南北市河皆古之潯溪

也

汪志按沈登瀛備志云祇園寺莊田記云有溪曰潯在潯之北有寺曰祇園然則潯溪即今之運河也文莫古於是

當從之若以嘗三中圩之帶水當之毋乃與苕霅諸溪不類乎

明吳國倫行經潯溪奉懷尚書學士董用均先生楚客蒲

帆震澤來南潯甲第錦雲開懸輿萬木尚書里載筆千秋

南潯志

卷四

河渠

一

太史才卧穩客星成水石丹還紫氣結蓬萊經過不淺追
趨意病骨龍鍾倘見猜

明余津潯溪漁唱二首 溶溶流水曲溪晴兩岸桃花溪上

生楊柳拂頭推不去黃鸝連叫兩三聲 蔡蕩天孤碧四

垂雨晴正好放鷓鴣沿河十里錦雲爛紅藕花香拂面吹

明葛一龍潯溪對雨市斷溪聲遠橋迴野色荒吹來數點

雨相送一孤航漲綠平官渡烟黃拂女桑隔花僧共語東

去是錢塘

董志林曉發潯溪將至苕城蕭寺疎鐘霜外傳荻花楓葉

散平川雲連野色人迷渡風送秋聲獨放船樹裏漁莊聞

曉汲橋邊蟹舍見炊煙忽聞采采菱歌起徐孺山頭酒旆

懸

董燠潯水秋漁曲南江秋來三尺深

水經注南江支分歷
烏程縣南通餘杭縣

與浙
江合

了了游魚躍碧潯櫂頭船子浮湖去一髮遙山欵乃

音 潯南潯北楓欲稀杪秋遙夜來漁磯澄潭列火挺义

入月落烏嘒船始歸

又吳船曲南江東下曲于巴苕霽西來襟帶斜一樹秭歸

三月暮疾風吹雨漲桃花 春事愁中與病中碧潯溜雨

一村風宋元名刹麻姑字咫尺輸他折屐雄

范鍇潯溪紀事詩佚志殘碑尚可稽當時沿革未全迷菰

城古邑三唐後誰識南林舊有溪 鎮戍監官古制存萬

家烟火聚雲屯太湖水利關民政安定齋空孰講論 十

南潯志

卷四

河渠

二

里桑陰水市通家家門外白蘋風五湖狂叟西村客愛作
潯溪老寓公

沈謙潯溪雜憶詩欵乃聲中暮復朝家家水閣泊輕橈潯

溪賸有閒風月盡在彎環兩石橋 兩點青山似畫圖一

溪碧水勝醞醐段家橋外遙相望葉葉風帆到太湖

紀汝霖潯溪道中口占喜泛潯溪棹黃梅天獨晴浪迎雙

槳健風蕩片帆輕鷺立橋梁溼人歸渡艇橫一篙新漲綠

處處插秧成

潘翥潯溪道中水氣蕩荷襟扁舟漾碧潯凌波容散髮得

句且長吟山遠晴雲淨江空樹影沈西風一蕭瑟薄靄忽

成陰

石溪 分小圩西南來水東流經化人橋至紀氏祖墳前爲仙
液潭又東經秀水橋轉北入紀家壩港

墨溪 運河南岸第五支港今名馬家港上承薛家漾水南流
轉東出長生橋轉北爲墨溪范莊灣港東南來注之又北經

明德橋東分南小兜 過朱少師第前東分北小兜 又北出馬家橋入東

市河汪志按墨溪之名明時已有之范志云康熙間張肩畫竹洗硯於此故名非也

董斯張初夏楊柳陰濃醉碧烟一溪不雨不晴天水樓處
處凭紅袖吳下新來茉莉船

張鑑潯溪棹歌 螭殼紅窗水閣邊墨溪初漲碧于煙杏花

衫子鷺翎扇倚檻閒呼茉莉船墨溪即馬家港盛夏多集花船董斯張詩水樓處處

凭紅袖吳下新來茉莉船是也

南潯志

卷四 河渠

李世伸潯溪棹歌 墨溪開徧戰場花寥落人家隔水涯指

點頹垣荒草裏當年曾是相公家朱文肅故里在墨溪

周慶賢墨溪訪友未遇舟次口占 風急扁舟渡曲江曲江即石

潯在墨溪之南 蓼花隨雨入船窗櫓搖界破中流水驚起蘆邊白

鷺雙 墨溪初漲碧於煙正是風寒欲暮天黃葉踏殘人
不見卻看塔影落篷前

鷓鴣溪 南市河西岸第二支港即蔣家橋港上承獮里潘家

埭西南來水東流經義塚橋北分談家灣 至八十畝圩與朱家板

橋南來水會又東北分平橋港 迤南經斜橋爲鷓鴣溪又東至豐

草庵前折而南流支流東出爲新開河鷓鴣溪又南經萬古

橋西分祁家兜即掛瓢池 轉東迤南西分南分麻皮兜 又東出蔣家橋入南市河

姚石春日晚步至鷓鴣溪不耐市喧雜尋幽到竹林橋低
春水漲徑小麥苗深野鳥投烟樹漁罾曬柳陰斜陽容小
立溪口好閒吟

曹仁虎潯溪竹枝詞鷓鴣溪水碧漣漪暇日宜教小艇移
有約招提茶話去枯苔手剔宋元碑

張鎮鷓鴣溪春望不定經行路平橋帶斷磯野花臨水發
江鳥破烟飛淨土閒相訪遙山晚更微漁舟何處唱余亦
詠而歸

又潯溪漁唱阿儂家住鷓鴣溪不見鷓鴣溪上嘯只有曉
寒樓外月夜深還照夢華西

紀磊鷓鴣溪鷓鴣生住鷓鴣庵名氏還須仔細參不爲落

南潯志

卷四

河渠

四

花啼不住觸人愁思在懷南

張文元南潯竹枝詞幾折清溪架石橋沿隄楊柳曉風搖
鷓鴣新製蕭孃曲合付漁郎紫玉簫

徐咸安初春野步一灣春漲碧泐泐信步溪邊遠俗氛得
暖水田猶漠漠向陽卉木亦欣欣梅花渡古無遺跡豐草
庵荒有夕曛忽聽西村漁唱晚歸來薄醉未成醺

蓮溪 在東柵薛家漾東俗名荷花池頭

董懋昭蓮溪吟稿序節錄溪方可二畝許中多蓮故以蓮名

之溪上大宅先王父芝筠先生故居也王父退老此溪之
上憶自垂髫上學每晨隨諸兄後詣王父書室則咸屏息
徐步雁行立拱揖而退不敢妄出一語昭冠偶墮地王父

亦莞爾而笑不之責也迄今二十餘年來課諸弟妣于溪側則吾家已日就衰落不復昔時景象溪北故有槐二株今僅存其一兩岸垂柳成行今亦變爲桑畦菜圃矣

董友松蓮溪夜步蓮溪風月夜夜靜石堂清月照溪生影風迴蓮有聲香沈忘鶴夢蛩怨冷鼉更烟霧青冥處蕭然碧玉京

董燠過蓮溪有感示舍弟鑑平繡原五柳先生早決幾人亡剩有柳依依稚孫曾奉掀髯笑揖罷私懷退筆歸衣得新荷牽伴侶籠他蟋蟀鬪輸贏溪邊長憶兒嬉事三十年來半死生

又過蓮溪追憶鑑平圓荷碧一池小樓踞其上昔君來授

南潯志

卷四

河渠

五

經安貧任疎放余亦時時過澄懷對新漲人靜魚不驚風清柳輕颺每指釣遊地兒嬉非一狀荏苒三十年爲師各顏抗吾衰早積唐而才與齒壯方當絕塵奔秋駕不可量何意偶西征存沒頓悲愴化鶴不復歸援琴怨孤唱行跡綠苔間獨尋何所向

董恂潯溪棹歌不村不郭占清幽水閣窗開面碧流吹得薰風纔幾日白荷花放滿池頭

瑤溪 在北柵外姚田

吳山秀瑤溪八詠環水茫無際渾疑一島孤祇憑雲作岸絕少路通衢辛苦營巢燕飄零逐浪鳧心安隨處好鹿豕盡吾徒 荒墟唯鳥集窮巷少人行隔岸雙橋跨虛舟一

渡橫女編蘆代織農種水爲耕難得村醪熟常時醉不成
北尋雙塔寺南望兩河橋宿雨片帆重平波三里遙秋
淤穿荻筍春漲沒芟苗蓑笠吾方辦不辭漁父邀 千帆
來北渚一鏡宛西湖量水分菱芡開門放鴨雛盤餐魚市
集烟雨米家圖合有元真隱棲遲興不孤 亭前誰載酒
橋畔自提壺屋北雙峯翠牆東半畝蔬與花分主客聚石
當生徒永日消書卷眞成槁據梧 斷港孤村僻通波十
里周蘆中人在水岸上屋牽舟霜月哀鴻雁沙汀狎鷺鷗
雙扉終歲掩蹤跡絕羊求 叢祠簫鼓沸傀儡舞偏工南菴
時演木偶戲以酬神 時聽迎神曲難回佞佛風陳牲集漁父散社醉
村農利市邀三倍空嗟吾道窮 不成行列樹自落子開

南潯志

卷四

河渠

六

花草辨君臣藥藤延子母瓜瓦盆長貯酒蔬譜足傳家五
日花豬肉臨溪喚小艇

王樑爻田有懷張瓜田蒼茫雲氣擁層樓對酒如何轉得
愁十里波濤侵短髻一天風雨入高秋綠蘿門外無過轍
紅樹村西獨下鷗傳語蓴鱸漫登饌天涯猶有未歸舟

淤溪 在南柵外藏穀橋

董漢策菩薩蠻淤溪歸路似雨如晴猶未雨風光搖漾愁
千縷鐵笛破蒼煙天邊一鶴還 秋生雲外樹信步隨秋
去牛背曲聲新南陽高卧人

又前調次日乘風復至淤溪似此長風能萬里濤聲吹送
秋聲起漠漠水雲天蛟龍挾我船 人隨帆影動拜舞千

花湧只此碧流中應知江漢同

芳溪 在西柵外方丈港綿亘一里許迴環廣百餘畝四周有隄雖無舟楫帆檣之利而饒魚鼈螺蝦之產農田灌輸惟溪是賴

運河 卽東西二柵市河每歲漕艘必由於此其源有二一自峴山漾分流至定安門外繞城而東一自城內雪溪分流至駱駝橋南過望州橋出迎春門俱達二里橋合爲一河東流六十里至東遷村自東遷而東其南岸支港爲白米塘挑水灣北岸支港爲十里橋九里橋六里橋等港南北交綜分合不一又東至三里橋支流北出爲三里橋港運河又東過西東二壩口入南潯鎮西柵爲西市河過營汎前祇園寺前支

南潯志

卷四

河渠

七

流南出爲西倉港北出爲永安橋港又東經垂虹橋東南流過米廊下紀家壩港西南來注之又東與南北市河交錯爲十字港又東爲東市河經通津橋過董宗伯第前通判署前

南分船場浜

皇御河南來注之

南分倉潭

又東經洪濟橋百間樓港北

南分三楊畝兜

又東過極樂庵前出分水墩爲東塔灣過撞塘壩口

入震澤縣界又東曹村西港南來注之又東曹村中港南來

注之

南市河東出支水東北流而仍注于運河者至此盡矣按水道源流並據里人紀南枝所著潯溪水道攷後

自此而東至半路亭其間南岸支港則有曹村東港盛家

壩港外墩港北岸支港則有駟馬橋港曹村北港亦南北交綜分合不一又東至安慶橋支流南出經應天寺巖墓市入

嘉興府秀水縣界運河又東至震澤鎮又東過雙楊梅堰至平望鎮入鶯脰湖與嘉興南來運河會東柵外自分水墩至平望凡塘南北諸漾蕩支河皆泄水歸東要道雖地屬江南其通塞皆關湖州水利唐元和中荻塘河水瀦淤逼塞不能負舟刺史薛戎濬之百餘里董志范志並云運河時或旱涸事若漕艘擱淺開濬運河事固屬官不屬民也乃載入志中幾疑民濬爲定例矣慮貽將來徭役之擾故特辯之

曹仁虎潯溪竹枝詞雁渚鷗沙足水痕陰陰桑柘接曹村西來一夜苕溪漲碧玉春流直到門

董蠡舟潯溪棹歌運河橫貫市心中南北支流屈曲通畫舫千家夾明鏡石梁三道卧晴虹

董恂潯溪棹歌千頓塘長遠岫青西天目水此由經桃花

南潯志

卷四

河渠

八

三月春波暖綠過江南半邏亭

皇御河 運河南岸第四支港按第三支港即南市河別見後一名御河一作

王御河本名黃泥河分薛家漾水北流東分蓮溪西分小兜經暖橋又

北出醬園橋入東市河汪志按俗說宋高宗至此故名舊志已知其妄不載是說然仍入之古蹟

未當也本作黃泥爲是或云當爲惶五河其東岸即惶五圩猶北柵外之拜五港稽五漾南柵外之簡五塘也說亦可通

范鍇潯溪紀事詩鐘敲野寺留神馬春到梅林說異蛇羸

得居人長歎息御河愁照月痕斜勞鉞府志建炎二年高宗南渡至潯懼追者見

匿嘉應神祠中月下俄見泥馬忽動跨之而行遂入杭州帝舊封康王今褒能寺俗呼康王寺以帝經過名也湧幢

小品鎮西北可十五里曰梅林中有大梅樹一株可設三

十筵宋高宗過潯謙其下因稱曰上林方到菴有一巨蛇衝水昂首而至眾魚尾之日以爲常若有意者高宗舉筆

題其首作小畫泣下懷之而去至鎮南五里古寺宿焉今

有康王橋橋之西爲康王寺廢已久矣一老儒每言鎮之

大橋下常有巨蛇橫亘如木舟礙不得行又居人數逢于

路兩眼加燈火見頂上有康王二字又或蟠于市樓上第
不傷人既數見亦不為異蓋其時人烟尚稀且萬家人物
過之乃一荒落見草庵景致不覺留連今聚離人口角且
日盛蛇亦非容身之所老者死幼者不及聞離人角且
五六十年天下大矣何所不有姑記之亦潯鎮一異事也
研北居瑣錄史載高宗南渡建炎三年二月帝至鎮江宿
于府治翌日召從臣問去留是夕發鎮江越四日次平江
又二日次崇德遂如杭州攷此則過南潯之說謬矣勞志
褒能寺與嘉應祠既溷而為一且嘉應祠咸淳六年敕建
建炎二年烏得見此廟額又聞諸父老曰皇御河舊名黃
泥河因有高宗南渡過潯之說遂相信也
傳會云異蛇神馬傳說紛紛不足信也

南市河 上承簡五塘港北流入南柵為南市河支流東出為

白鸞港市河又北蘇露港西來注之又北支流東出為虹映

港市河又北經南新橋支流東出為竹園港市河又北經南

安橋鷓鴣溪自蔣家橋西來注之支流東出為鳳凰河市河

又北經華家橋鷓鴣溪自新開河西來注之又北經興福橋

南潯志

卷四

河渠

九

西分寸池潭

又北經張王廟橋支流東出為定心港市河又北與

城壕及司前港交錯為南十字港又北經便民橋又北出泰

安橋至十字港與運河會

北市河 分運河水自十字港北流入清風橋為北市河又北

支流東出為後河市河又北經太平橋西分寸唐家兜又北經鹽店

橋又北經柵樁橋與西木行港及百間樓港交錯為北十字

港又北過北姚家匯潯溪河西來注之又北經北新橋東分寸小兜

至董氏祖墳前彩虹橋港西來注之支流東出為下壩港市

河又北出北柵與古漣港接按北市河自北十字港以北即為古漣港

後河 北市河東岸第一支港一名藕湖分北市河水東流入

天帶橋又東南分寸愛蓮池小兜經淨波橋又東迤南為栲栳灣經官

房橋轉東出聞濤橋入百間樓港

新開河 南市河西岸第三支港明董氏所開分鷓鴣溪水東流出鷓鴣橋入南市河

董恂濤溪棹歌新開河畔幾人家野徑栽桑復種麻豐草
庵荒已無主爛堆黃葉似袈裟

鳳凰河 南市河東岸第四支港分南市河水東流入鳳凰橋迤北又東出毛家橋入木瓜漾

濤溪河 北市河西岸第二支港分嘗三圩西港水東流出濤溪橋入北市河溪小水曲下有泉穴水極清澈取以釀酒最

清冽濤酒因以得名

汪志按此河明時始開通而冒濤溪之名實非古濤溪也

姚景燾夜過濤溪河晚晴秋已暮積雨漲溪痕雲淨江天

南濤志

卷四

河渠

十

遠烟凝草木昏暗蛩吟古墓寒月弔荒村四顧無人跡淒淒欲斷魂

董懋昭早行溪上寒雲曉日尙蒙籠疎樹遙村淡似空忽悟西風夜來緊枯萍盡聚板橋東

張樹培濤溪河濤溪溪畔偏桑麻溪上人家傍水涯釀得黃柑霜後酒晚風輕颺一帘斜

西倉港 運河南岸第一支港分西市河水南流入沐鳳橋

分西

沐鳳

兜 又南經鳴鳳橋又南出壩橋入紀家壩港

紀家壩港 運河南岸第二支港上承藤里褚家埭談家灣二港西來之水東流至補船村與平橋港南來之水相會北流至小圩西南分爲二直北而轉東者爲小圩後港轉東者爲

小圩前港

東分南兜

前港轉北與後港合支流東出為石溪又北

轉東為享亭灣過西莊村經鍾家橋與石溪水合為紀家壩

港又東西倉港北來注之支流東出為城壕紀家壩港又東

經楊家橋

南分白鵬兜

迤北經天到橋

北分鳳池

東北流出豐年橋

八西市河

三里橋港

運河北岸第一支港

按運河西來支港甚多今取距鎮最近者為始

分運

河水北流入三里橋又北過裘莊方氏祖墳前與塘田圩港

西來之水相會又北經眾安橋分流向北者為方家港轉東

者為福積港

永安橋港

運河北岸第二支港分西市河水北流入西弔橋

又北經小弔橋

西分妙庵兜

又北出永安橋與嘗三圩西港接

西分

南潯志

卷四

河渠

十一

琵琶兜即白果潭

合流東出為西木行港入北市河

百間樓港

運河北岸第四支港

按第三支港即北市河別見前

分北市河水

自北十字港東流八蓮界橋又東迤南經長板橋又南後河

西來注之

東分洗粉兜

又南出東弔橋八東市河

北市河東出支水東南流而仍

注于運河者至此盡矣

方熊潯溪竹枝詞參差闌闌壓溪流長板橋連洗粉兜夾

岸珠簾風宕漾春波影泛百間樓

董攀龍潯溪竹枝詞傍水千家斷復連小樓一桁碧窗懸

娥娥紅粉齊當牖新到姑蘇茉莉船

張文元南潯竹枝詞百間樓住百人家一水清漣繞檻斜

莫怪賣花船競泊樓間少女盡如花

簡五塘港 卽南市河之上流一作甲午塘港上承馬要塘西

南來水東北流過池亭漾合神墩塘南來之水迤北而東爲

七里塘迤北至大洪村經丁家橋轉東經康王寺橋分流向

東南者由四方蕩入沈張漾向北者爲簡五塘港紀南枝曰舊志皆稱

烏鎮北息塘之水北流至穿珠灣由大洪村康王寺橋入簡五塘因穿珠灣在大洪村東南比近故也實則簡五塘所受

皆屬幹河之東北流至烏鎮之北流不獨不能由穿珠灣西

北流入大洪村抑且分七里塘之水由穿珠灣東南流同入沈張漾水性惟順是適可目驗而知也 簡五塘港北流與蔡蕩自豐橋西來水

會西分豆腐兜又分高基兜又分許家兜東分硬漲橋 又北港通划船漾又分閔塘兜一作閔堂兜又分華家兜

與南市河接

張鑑潄溪棹歌霜花曉撲漉魚籃白韭紅薑食譜諳簡五

寒塘秋水闊漁娃處處喚螺蚶簡五塘多集漁艇

南潄志

卷四

河渠

十二

沈金渠甲午塘今是庚寅日來過甲午塘荒城尋太尉野

廟拜康王艇小瓜皮泛村深竹影藏陰晴天氣半節候已

梅黃

蘇露港 南市河西岸第一支港上承箋五圩南北二港之水

其南港上承鳳凰蕩南來之水北流轉東至唐家匯與蔡蕩

南來之水相會而北經麻涇橋西分長兜 又北爲邵家蕩轉東經

洞賓橋轉北爲善田灣又北與北港會其北港上承瞭里方

家埭西南來水東流北分朱家板橋港 爲北水港經北水港橋北分曹家

兜 迤南又東與南港會爲蘇露港北分糠兜 東流出蘇露橋入

南市河

白鸞港 南市河東岸第一支港分南市河水東流八百老橋

迤南又東過潘氏祖墳前迤南又東南分南分流向北者爲
渡船港向東者爲尤家港

虹映港 南市河東岸第二支港分南市河水東流入虹映橋
又東爲黃家蕩東分虹映兜轉北出師古橋入竹園港

竹園港 南市河東岸第三支港分南市河水東流入醋坊橋
至張處士墳前與虹映港南來水會繞墳而北西分壽慶庵兜又北

東分南林池及孫家兜至嘉應廟前爲木瓜漾東分華家兜鳳凰河西來注

之轉東經王家橋爲石澥屈曲而東名曲江又東至朝眞堂
前支流北出爲范莊灣港曲江水又東支流南出至磧沙寺
後與渡船港南來水相會而東爲懼三圩南港曲江水又東

經八卦橋南分小兜又東經秦庵橋又東轉北東分褚家兜又北西分韓家

南潯志

卷四

河渠

十三

兜轉東爲玉成灣北分烏朋兜一作烏盆兜經朱氏祖墳前又東支流南

出爲懼三圩東港北分撞塘壩港壩南有麻皮漾曲江水又東入震澤界又

東轉北爲曹村西港又北出木橋入運河

定心港 南市河東岸第五支港分南市河水東流入定心橋

至廣惠宮後南北分流南流經花園橋爲勝義庵兜北流入

司前港

司前港 南市河東岸第六支港卽東交界壩港分南市河水

自南十字港東流入東交界壩橋又東經會際橋又東定心

港南來注之又東爲薛家漾分流向北者爲皇御河向南者

至城隍廟後轉東南分小兜出長生橋轉北爲墨溪並北入東市

河

西木行港 北市河西岸第一支港永安橋港與嘗三圩西港合而東流爲西木行港又東至北十字港與北市河會

彩虹橋港 北市河西岸第三支港亦稱北潯溪河分福積港水北流入彩虹橋轉東至竹籬匯入北市河北市西隅諸水流注市河者至此盡矣

古漚港 卽北市河之下流一名鼓樓港北流出北分水墩西

李家河自南車駕橋來會又有橫古塘水自北車駕橋來會東分箬帽橋港又分匠人灣又分斜河並通湖基漾

經北迴橋 東分樓下新橋港又分冉莊港又分姚田苧葉灘 入震澤界又北達稽五

漾或東或北支流歧出由各漚港入太湖

下壩港 北市河東岸第三支港按第二支港卽百樓港已見前 分北市河

水東流 南分董墳兜又南姚家兜 又東北分金 經梅家橋至新庵前南分

南潯志

卷四

河渠

十四

地心 折而北流轉東入震澤界支流歧出東入洚溪北入稽

五漾

十字港 在中市通津橋西清風橋南明月橋北運河與南北

二市河交午相貫處

曹仁虎潯溪竹枝詞 港汊縱橫盡水鄉菱歌隱隱起迴塘

清風明月何曾改依舊雙虹跨水長

董載昌潯溪竹枝詞 市樓燈火映波紅十字中分處處通

一水盈盈不得語郎家明月妾清風

南十字港 在南柵便民橋北東西兩交界壩橋之間城壕西

來司前港東出與市河交午相貫處

北十字港 在北柵柵樁橋北蓮界橋西西木行港西來百間

樓港東出與市河交午相貫處

渡船港 白鸞港水北流為渡船港經渡船橋至袁孝子墳前

東西分流西流者轉北西分紀至磧沙寺右按此處本通東

流者轉北與曲江水支流自北來者相合而東為懼三圩南港

尤家港 白鸞港水東流為尤家港南分泥經尤家橋南分孟

又東懼三圩南港北來注之又東入栗樹港

懼三圩南港 渡船港與曲江水支流合而東流過尤氏祖墳

前轉南入尤家港

栗樹港 烏程震澤東西分界一作力持港南接划船漾經莊

思壩橋北流與尤家港西來水會又北經栗樹廟橋又北與

南潯志 卷四 河渠 十五

懼三圩東港水會為栗樹蕩一名蕩東流八震澤界為橫港又

東轉北為水斗注又北轉東為曹村中港轉北出樹滋環橋

入運河南市河東出

福積港 上承三里橋港南來之水東流過小橋村北分馬家

丁家又東為白漾北分潘家兜又東經福積橋南分菜又

東北分莫過姚家灘南分戴南北分流北流為彩虹橋港南

流為嘗三圩西港

嘗三圩西港 分福積港水南流支流東出為潯溪河嘗三圩

西港又南東分朱與永安橋港接合流東出為西木行港

范莊灣港 分曲江水北流八曲江橋西分西北流過范莊灣

入墨溪

懼三圩東港 分玉成灣水南流轉東折而南流又轉東入栗
樹蕩烏程震澤東西分界

蔣家港 無攷或云在南柵蔣家街後河故今呼補船橋為蔣
家橋

紀官蔣家港夾岸陰濃柳似幢小橋流急水淙淙扁舟逆
上櫓無力篙足驚飛布穀雙

城壕 南市河西岸第四支港即西交界壩港分紀家壩南出
之水東南流東分紀氏南園池迤東南分小兜北徐家漾出西交界壩橋至

南十字港與南市河會南市河西隅支水流注至此盡矣 元代築城時南
面偏西之壕也亦名城隍上汪志按城四面皆有壕惟此處

南潯志 卷四 河渠 十六
攷之城壕轉北通西倉港西南面之壕也司前港自薛家漾
通馬家港東南面之壕也百間樓港東北面之壕也西木行

港轉南通永安橋港西北面之壕也因是推之東弔橋西南
洪濟橋為東水門西弔橋東南南垂虹橋為西水門北十字港
南柵橋為北水門南十字港北便民橋為南水門
而中市十字港則為城心也城之遺跡約畧可知矣

董燠吳船曲不復曠烏樓女牆長烟冪歷舊城隍斷橋流
水春畦綠閒殺羅敷陌上桑

楊鳳苞城壕覽古廢隍尙見黑雲屯歎息三興破楚門錢
俶錦衣空內屬尉陀左燾漫稱尊白駒北夢舟中夜黃葉

西風水外村當日羣雄總安在野烏曠上女牆昏
董攀龍潯溪竹枝詞斷垣殘礎沒藜蒿陳迹流傳雉堞高

割據英雄今已矣夕陽仍下古城壕南潯城張士誠建明洪武初拆修蘇州城
丁源故城壕溪迴徑仄似羊腸荒草堆邊舊女牆村豎牧

牛殘照裏空留遺廟說張王廣惠宮一名張士誠廟或云即元張士誠也

周慶森城壕行吟間向古城濠風展文漪綠一篙昔日堞樓雄百尺憑臨誰是舊詩豪

李世伸潯溪棹歌吳山越水重邊防太尉城餘夕照荒有客大隄來走馬興衰舊事話張王元末張士誠築城於潯

石解 在南柵以北岸有眠牛石得名一名曲港一名曲江一名九曲里

董蠡舟潯溪棹歌一棹延緣石解過華園秋晚起菱歌遠偏廬圯生綃斷古木叢篁畫意多石解菱歌為十景之一

董恂潯溪棹歌石解灣灣九曲環村娃打槳采菱還清歌唱到斜陽暮秋老漁汀鷺漱間南潯十景有曲江菱歌

南潯志

卷四

河渠

十七

約芳塘風起處有人低唱采菱歌

蔣錫綸潯溪竹枝詞小艇瓜皮喚欲騰花花葉葉碧波澄煙籠石解歌聲歇俊味新嘗沙角菱

周家漾 在北柵外後築為卧塔

稽五漾 在北柵外震澤縣界一作居吳漾一作軍吳漾一作

金魚漾一作雞魚漾荻塘以北諸漾稽五最大汪志按或以軍吳之名指

為吳王屯兵處無據蓋在稽五圩之北故名漾地屬震澤而與烏程交界漾南之稽五圩屬烏程又為潯鎮諸水下流故入仍載

明董說軍吳漾秋漾荒荒白軍吳事杳茫詩緣隨窄艇風信委枯桑泥塔雙橋串驚濤破寺當因之話黃鶴樓勢等

孤翔

釋正提泛軍吳漾一霎孤村烟裏過數圈嫩綠插靈籤遠
山雲迸離奇翠一幅瀟湘畫裏添 艣勢挖開雙燕尾鴨
頭撐出蓼花汀長天皎潔無渣滓秋水相連別樣青

紀官雪後舟行軍吳漾何須更築望山臺縹緲羣峯盡載
來漾口幾枝無葉樹村梢一角欲開梅莊嚴野寺俱瓔珞
珍重寒爐撥冷灰放鴨船邊冰未解竹篙攔陣忽然回

紀端軍吳漾扁舟湖上憶鴟夷折戟苔槍遠莫追堪笑吳
儂真短淺爭看畫舫載西施

董渭十七夜軍吳漾泛月寄文若中秋把酒書樓上今宵
又泛軍吳漾一葉舟從鏡面行絕勝醉卧梅花帳人生到
處類飛鴻雪泥爪記常飄蕩漁燈閃閃遠岸明蘆花片片

南潯志

卷四

河渠

十八

秋空颺恍如萬頃碧玻璃水色天光兩清亮前途極目杳
難窮自在中流頗蕭放扣舷撻槳歌滄浪聲散淒風隨野
曠夜來露重浴蟾蜍天公眸子無纖障此時安得謝元暉
彎跽篷底相酬唱

董載昌潯溪竹枝詞居吳漾畔徧菰蘆蟹斲漁標不納租
此去太湖無十里眾船聘得陸家姑

董蠡舟潯溪棹歌北匯秋深蘆絮殘星星蟹火照波寒居
吳漾口移舟宿十輩尖團供晚餐

拜三漾 在北柵外三里古漚港東俗名湖基漾

薛家漾 在東柵司前港西來皇御河北出東接蓮溪南通墨
溪十字交匯下有泉穴水極清深亦稱雪漾

木瓜漾 在南柵嘉應廟前

徐家漾 在南柵白鷗兜南

划船漾 在南柵外三里簡五塘東烏程震澤東西交界

瀏盆漾 在南柵外四里簡五塘東

沈莊漾 在南柵外五里四方蕩東漾東岸屬江蘇省周十餘

里相傳明沈萬三所居近此故名

穿弓漾 在南柵外七里雙月灣東

池亭漾 在南柵外七里村西或云即淤溪

紀端還至淤溪池亭一棹歸來醉似泥漁罾蘆葉點秋溪

丹黃隱約疎林裏欵乃聲中日已西

褚家漾 在西柵外九里

南潯志

卷四

河渠

十九

磔子漾 在西柵外東莊港東

江蔣漾 在西柵外楊灣口

蔡蕩 在南柵外二里簡五塘西一名草蕩漾

按鎮東北有蔡蕩屬震澤界

與此別

明董份夏日與諸君避暑蔡蕩漫擬當年河朔遊偶攜佳

客放扁舟天高月上夜如晝水闊風多暑欲秋簫管拂雲

來別墅酣歌達曙傍中流若知世外須臾樂肯羨人間萬

戶侯

明董嗣成紀子達子修昆仲夏夜相邀蔡宕玩月醉後放

歌青松軒下微雨收清風六月涼如秋明月斜銜碧雲裏

赤日半落西山頭主人不辭酒百斛清宵擬作乘槎遊乘

槎蕩槳出村口小溪夾道垂楊柳侍兒初返採蓮船玉腕
纖纖進新藕擊楫行歌出畫橋紫簫曲曲度蘭皋蒹葭風
靜湖光白星文不動青天高青天倒映湖光裏鮫人龍女
聲嘈嘈散髮一呼數斗盡河朔空復稱英豪千年劉阮已
寂寞卽今此樂輸吾曹尊中已空不足恣酣暢又有輕舸
送新釀中流宛轉夜未央狂來大嘯踏高浪相逢總是高
陽徒此時不飲何爲乎青春一去不相待富貴可得常在
無浮生碌碌竟何事雙鬢辭我先凋枯飲君酒爲君壽惟
願清風明月對金尊與我相隨同白首醉眠不知天地復
何處但見星辰歷亂在我手

又十六夜與諸君再集蔡蕩得城字雲垂一曲鑑湖平乘

南潯志

卷四

河渠

二十

興重來此濯纓五夜霞光飛別嶺千家秋色澹孤城輕槎
忽動星河影尊酒高懸薜荔情若向靈臺占象緯真人今
已奏東行

董蠡舟潯溪棹歌老漁吹火水中坻西莊村邊晚飯炊瑪

瑙四垂天澹沱雨晴蔡蕩放鷓鴣

明余津潯溪漁唱詩蔡蕩天孤碧四垂雨晴正

好放鷓鴣

蘆蕩 在瞭里西南

黃家蕩 在南柵師古橋南

四方蕩 在南柵外瀏貧漾東南

淺蕩 在南柵外沈莊漾南

蓮花蕩 在南柵外眉月灣北

荷花蕩 在北柵外駐越灘南

白果潭 在西柵朱家墳前

仙液潭 在西柵紀氏秀水墳前亦名半月池潭底有三泉涌

出如品字每歲十月朔鯉魚集此里人網取頗多

夢華潭 在南柵本名秤錘潭亦作寸池潭明董說居此改名

按舊志皆作硯池云相傳梁昭明太子讀書處附會無據

明董說行藥夢華潭口吟立西南角潭秋雲亂生浦思前

夜釣樹露別村晴記補竹籬缺私拈客句評醉漁歌正好

再轉後溪行

又夢華潭卽事用非翁疎字韻白豆花陰藥杵疎閑忙爲

曝舊藏書浮名徒益九重障草木曾參七不如秋園縛帚

南潯志

卷四

河渠

二十一

難供埽石壁纏藤合受梳擬鑿小溪通釣艇從教野史補
河渠

又夢華潭謠

鷓鴣生貧而嗜書一日遇南宋舊本紙墨既繁還書長慟故託爲書賈愁望之聲

夢

華潭口石齒齒枯柳身敲拜秋水夢華潭泊鸞書舟客望

殘陽立柁樓立柁樓見書屋菊籬中人抱書哭

方熊潯溪竹枝詞一泓淨綠水挖藍牛飲荒汀百不堪莫

借昭明誇硯沼祇今但曉秤錘潭

董載昌潯溪竹枝詞陌上花開三月三相邀女伴寸池潭

踏青無數匆匆去明日清明欲養蠶

范鍇潯溪紀事詩夢華潭口晚風吹一抹殘陽柳影敲舊

事嘉隆傳韻語恍聞閒話水天時

豐草庵集有夢華潭口聽客話嘉隆間大內舊

事詩
十首

紀磊夢華潭夢華潭口唱新詞補出前朝大內詩玉盃金魚何處問空教遺老淚如絲

張文元南潯竹枝詞小小池傍桑柘幽夢華人去古潭留而今新漲黃梅水閒看兒童浴蠶牛

夢石樓潭 在補船村豐草庵旁董說嘗夢登石樓故名

捨身潭 在南柵嘉應廟前按今漸湮塞舊傳崔李二承事自沈此潭乃里俗謬說

倉潭 在東柵朋董氏所開以泊租船

西林潭 在西柵西林古剎後

范莊池 在馬家港范莊水甚清大旱不涸湧幢小品云廣十畝按今池分為二

較小于前矣

南潯志

卷四 河渠

二十二

曹仁虎潯溪竹枝詞范莊小沼碧粼粼卜宅當年種翠筠可惜五湖輕泛去不曾同住浣紗人

董恂潯溪棹歌滿沼荷花映日紅范莊池上坐荷風阿儂

只愛池中藕多與西施臂樣同南潯十景有范莊蓮沼

鳳凰池 在西柵紀家壩港西北池盡處有二泉旁出

明華士嶠李振業移家南林鳳凰池春日過訪賦贈小築

菟裘隔市喧閒雲擁戶日高眠短牆風折梅枝瘦曲徑春深筍稚鮮濁酒儘拌詩似白空亭堪寄草成元修篁應自來棲鳳紫氣遙占豈惘然

放生池 一在極樂庵一在東藏寺南今並無攷一在長生寺前亦名長生池亦名挂瓢池俗稱魚池涇荷花頗盛一在報

國寺前亦名南林池或云卽鎮學泮池也

董漢策放生社冊序

錄節

家倩沈子子兼集同志爲放生社

蓋欲與飛潛同保此生也

又放生弁言

錄節

此翁禪師與家江屏閬仙輩結放生社潯

水淪漣飛榭上下吹沫鼓翼極乎霄淵

明董斯張張泰氏於報國倡放生社欣然有賦入界曠求

我迎照藹不殊元黃自相血靡哲而弗愚居士平等慈齋
心澄物初風澤無二觀心腎爲江湖文波停晝梵鱗者還
其居解斯蕩析愍至仁消响濡中林懸日規萍藻相與舒
飛沈在天地往來於一如浩焉川上機樂我了非魚

董漢策極樂庵放生解網開籠今日意雲痕月路望中微

南潯志

卷四

河渠

二十三

碧天極目升沈趣漠漠長烟鳥自飛 微波澹澹荇花新

澤國初占魚樂春傳說江淮多草食嘯號還有路傍人

董耒塔院放生社詩爲此山和尚賦品物同天賦淒然各

性情莫將鮫室淚滴向藕花城廬氣連雲黑蝦瞳翦水明

濠梁圓舊社願借遠公名 澤國新波及江天夜雨深冷

他調鼎手閒殺羨魚心 賴尾離塗炭修鬢切梵音猶將枯

肆泣彈入伯牙琴

丁蟾長生池觀白蓮數弓池匝梵宮寬玉蕊香浮露未乾

淨土一般朝涌出霓裳萬隊夜清寒花容倒暈長空空水

色澄心止觀觀小住渾忘炎暑逼閒鷗時掠水晶盤

張鎮潯溪漁唱庵遺豐草夕陽斜一曲溪橋楊柳遮若箇

幽情忘未得挂瓢池畔看蓮花

張文元南潯竹枝詞挂瓢池改小蓮莊弔古誰知選佛場
愁絕蓮花千萬朵低頭也似感滄桑

愛蓮池 在大宗伯第內西有小兜通後河

長池 在東柵外分鄉瑾側

義井 在南柵嘉應廟大殿前明隆慶三年重開

眞武井 在北柵善寂庵內亦名七星井

張模潯北七星井記

節錄

余家潯之北其地舊名井臨頭亦

作井陵頭西北數武有廟數楹額曰北聖庭西檐下有井
一闌鐫八字曰坎水制火永息烽烟旁鐫小字三行曰乾
隆五十捌年吉日信官溫雲皋重開井泉住持南蓮建其

南潯志

卷四

河渠

二十四

背更鐫坎水八字較前差小訪之故老曰此處舊有井七
焉曰七星井皆不出數十武外今多湮塞莫能指其處惟
此井獨存而重浚時曾植七星旗一桿於井上以存其遺
復訪餘井處有言廟牆外西去數武昔有一井約畧可辨
而余家後屋曾聞跨井而建則又爲二井其餘四井數年
來屢求不得其處余因歎舊蹟之不彰紀載闕如年代莫
考而重開茲井者又未詳溯其顛末因謹記之

木瓜泉 在南柵木瓜漾西毛家橋北埭岸址有泉旁出

一線泉 在西柵妙境庵兜底水涸時土窟中有泉流出涓滴

不絕水漲則隱一名竹雪泉

張鎮潯溪漁唱纔過詩橋妙境庵祇園鐵佛舊曾諳泉飛

竹雪清如許活火煎來活水甘

董蠡舟潯溪棹歌太傅祠堂枕碧川春波清淺僅通船

脣炊火烹新茗斟得涓流一線泉

水利附

談鑰吳興志郡地最低性尤沮洳特宜水稻又田疇必築塘防水乃有西成之望潞則以車出水旱則別入水今郡境東南鄉分延袤百里田舊有圍塍岸歲修崇固悉爲上腴畝直一金舊諺云諸郡旱我有岸諸郡熟我無穀今不然也 太湖舊有沿湖之隄多爲漶漶有斗門制以巨木甚固門各有牐板旱則閉之以防溪水之走泄有東北風亦閉之以防湖水之暴漲爲利浩溥後漸堙廢頗爲郡害

南潯志

卷四

河渠

二十五

徐獻忠吳興掌故集湖州運河東達平望幾一百二十里太湖

之水半泄其間

按此以運河爲太湖下流誤

自運河以南諸溪港經泄之

處爲民間所占日漸狹小而上源諸漾積受洪流之處漸至填塞爲蘆埂圈築爲藕蕩者又不知其幾也是可不爲厲禁以防關閉之患哉 元周文英三吳水利云蘇湖常秀之田高下不等大率低田十有其七高田十有其三吳越錢氏之在東南專享此利蘇州有營田軍四部共七八千人又有撩淺夫專爲田事導河築堤以減水患於是歲熟錢五十文糴米一石 元潘應武言浙西道自歸附官慮哨船入境擄掠鄉村將河港釘斷亦有築爲壩者所以水流不疾不能滌去淤塞 忠按成化九年添設蘇松常嘉湖五府勸農通判所

屬縣縣丞各一員近復革去今世冗官理應裁省者甚眾惟勸農官獨不可少所謂勸者專管水利以興農功者也蘇松在震澤下流淤澱日甚吳淞江已爲平陸而稅額日重加派不息吳興居於上流其入太湖之水旣爲吳江所遏塞則其南向之流所係亦甚重而圈爲菱藕之蕩塞爲桑麻之區日益加多苟無專官治之其誰已哉

董斯張吳興備志方道通判平江府嘗論太湖高于運河當疏

雪川浦漉之要者庶無飢歲後湖府得其說爲之果有功焉

樓鑰攻媿集

嚴訥論水利圩圖今天下以墾田當司農鉅供者

蘇松爲最蘇松介在湖海厥土塗泥利害以水圩岸者所以堤水而田卽周禮稻人匠人所掌塗防者也田甚下濕岸則

南潯志

卷四

河渠

二十六

陡立如城河循其外而中田焉禾在田雖芄芄起矣而河流猶出其上舟行者蓋俯而窺焉岸或咫尺莫禦而田且沛澤矣其田之最高阜去水遠而水不及溉者則終古爲鹵田在上下壤之間土厚而水深則號膏腴以其得水蓄洩可爲旱澇備而所爲能蓄洩者以有圩岸耳歲苦旱則河之水續桔槔而上以入于田河不龜坼田不乏溉歲苦潦則岸水出于河而岸障之雖勞人力不盡待命于天自三江道湮疏濬失宜恒雨注積而無從尾閭也水襄于岸寸許而膏腴汨爲巨浸不能與下濕者論良瘠矣且圩岸之有無其利害彰彰也農民櫛沐蔗蓑罄室竭力于田而婦子懸命焉寧束手于一朝之患號呼奔走其傍痛莫之救而獨不爲先事之備余怪

而究其說矣每圩田畝姑以千計田其中者姑以百計百家之中有十不協力而九十家者修築之無益也農雖值有年僅給俯仰困于澇而轉徙者眾矣宜未暇爲圩岸計岸土取于田岸寬則田窄小民愚不察其損小而利大也續文獻通攷按此無預湖事然治水者以湖治湖不若以三吳治湖也此則論圩田極詳張故備載之按水鄉多低田故其害澇甚于旱而其利亦泄亟于瀦以宣下流固圩岸爲要務湖與蘇無異也董氏備載此論旨哉試以所聞所見者論之嘉慶九年之水大矣道光三年尤大而二十九年又大于三年豈非河身日淺圩岸日低之明驗歟

朱國禎湧幢小品隄之功莫利于下鄉之田余家湖邊看來洪荒時一派都是蘆葦之灘却天地氣機節宣有深有淺有斷有續中間條理原自井井明農者因勢利導大者隄小者塘界以埂分爲滕久之皆成沃壤今吳江人往往用此法力耕以致富厚余目所經見二十里內有起白手致萬金者兩家此水利築隄所以當講也

鄭元慶石柱記箋釋環湖之水悉注于太湖微太湖民其魚乎

所謂導水以疾趨太湖者水之道也決之而已矣議者謂木簾魚斷樁
概之類皆能壅水亦一說也至于決太湖之水以放于海其事固在蘇松

張鐸府志按三吳之水利在下流而吾湖之水利在漚港自宋

迄元代有治績永樂以後自監司以及郡縣俱設有水利官專治農事每圩編立塘長卽其有田者充之歲以農隙官率塘長循行阡陌間督其築修圩滕開治水道水旱之歲責其啟閉溝缺時其守護而檢報災數焉迨至中葉農政不修水

利官漸次裁去所謂塘長者徒以勾攝公事起滅詞訟而已
違問其爲水利哉近年沈樂存侍御上疏請開太湖下流并
淩港章下所司勘覆不行因作東南水利編大指以爲湖水
爲患要在疏橋口以出江濬江以達海而湖州所屬各淩港
築隄置閘以捍風濤亦與疏濬相表裏要言不煩可當石畫
也

張鴻鶴南潯文獻志潯鎮西來之水由湖州府城定安門合迎
春門沿東塘而至南來之水由烏鎮而下其源皆發天目按
縣志南條之水發源天目之陽西條之水發源天目之陰南
自定安門而入曰雪西自清源門而入曰苕合于江渚匯總
名雪溪其巨流出臨湖門支流出迎春門雪溪之水出迎春

南潯志

卷四

河渠

二十八

門按沈登瀛備志云郡中之水自西來者曰苕溪入清源門至於江渚匯自南來者曰前溪曰餘不溪曰北流水三水
會于岷山漾入定安門至于江渚匯然後謂之雪溪今人誤
以打柴灣爲倒雪灣謂雪水自南來又誤以閘水橋爲雪水
橋謂雪水自西來至于苕溪發源廣苕山在天目山之陰今
人附會苕水自南來創爲南苕之名殊不知山海經浮玉之
山苕水出于其陰未嘗言出于其陽也其支流至塘北分注各淩港其巨流東

過潯溪入吳江之鶯脰湖東南入嘉興秀水桐鄉諸邑烏戍
志鎮水發源天目山之險潭歷苕雪二溪自涵山東流其在
西柵者一股由通湖橋而北達南潯總之潯鎮諸水其來也
西南皆以苕爲源其去也東以鶯脰湖爲委北以太湖爲壑

按此畧本潯溪文獻文獻又云雪自在湖郡豈溪東南流乎
烏戍志蓋因苕而誤爲雪也今攷涵山之水固與雪無涉且
烏鎮來水至穿珠灣卽折而東流實不至潯豈運河中亦無雪水
後人誤會文獻之意并謂雪水不至潯豈運河中亦無雪水
乎大謬

胡承謀湖州府志湖之東塘往來要途河直而狹洪水驟漲數

至踰岸築之宜高然無波濤衝激故邊可石中可泥濶亦丈

許可也

丁元薦湖塘遺議

據烏程縣詳稱太湖為湖郡下流苕霅

諸水俱以湖為匯歸其上流出水之漚港不無壅塞一遇黃

霽陰雨山水旁溢自應少為疏濬若必開濬深廣恐遇旱則

太洩而車戽無從遇澇又恐湖水泛漲而疆理可危誠不若

略為疏通順自然以備蓄洩倘入海入江之下流毫無阻滯

則湖水不致泛漲而湖郡無水患矣

范承勳覆開太湖疏按此論蓋不知漚港各

有插板以時啟閉乃轉以深通為慮又諉諸下流夫下流宜通而漚港則不可深廣此何理歟如其所言是漚港之設有

害而無利矣不亦偵乎

羅懷烏程縣志

自東關外至平望官塘苕霅諸水皆歸于塘北

南潯志

卷四

河渠

二十九

進漚瀆而至太湖其塘橋內支河現在通行而淤淺者十之

五六向因兵燹盜賊築塞不通者十之三四即宜早為疏濬

毋使附近豪猾分踞網斷東塘之水港不通即有漚瀆難洩

童國泰水利條議

董世寧烏青鎮志昔吳越天寶八年置都水營田使以主水事

募卒為部號曰撩淺軍談水利于今茲撩淺誠為急務但恐

奉行不力有名無實則徒費錢力耳蓋募夫供役取辦于富

戶部夫督役責成于有司二者皆非所樂必致阻撓而後已

張履祥云耕者各浚其田之際其不耕者田主給其食佃戶

出其力惟閒曠之所乃用眾力在經濬經在支濬支有司警

其頑惰自私梗令異議者分界刻期以鳩羣作不及一二月

在在皆通矣

見張楊園集

置水柵所以備寇盜也鎮四隅設柵

立法非不盡善然承平日久怠玩相循所稱建柵扃閉者不審地勢之要害僅于市梢橫一短木雖有鎖鏈都不堅緻歲久聽其木朽腐而並不更易宵深而閉未旦而啟猝爾有警詎堪防禦況港汊既雜逐路可遁不必盡由柵也卽扼要之處有橫木以拒之而乘更闌守望之疎亦不難毀而八耳昔者禾郡太僕李實君有言曰置柵當于離鎮半里許查有小水接連大水緊切去處兩邊密釘椿木四五層中作水門一通船出入鎖鏈務須堅鉅點附近殷實之人編定工食從厚給與于柵之左右地面構屋數椽令彼棲守仍于各柵口安置橫木以時啟閉此後卽有綠林竊發能斬柵而入乎縱使

南潯志

卷四

河渠

三十

得人看守者力不能敵亦可從陸路抄至第二層內柵邊呼集居民助其聲援則以眾禦寡兼之人而難出勢卽成擒所謂重門之險也柵成于冬月水涸時逐一看驗損壞者輒行修補則民無探丸之恐官免捕緝之勞太僕雖爲嘉郡言之而變通宜民實有規異勢而同形者仿而行之未始非守土之良謨也盜賊往來利于捷捷莫捷于撻船蓋撻船用槳而不用櫓一船僅用兩櫓用槳則一葉之艇槳愈多則愈速且手持一槳便于回旋卽可當器械以拒追捕之人其害不可勝言予承乏茲土洞悉其弊條議陳于監司一切撻船概從禁止船廠不得製造其現在者改短船身用槳者易而用櫓則已成之舟不致宿于無用而草竊奸宄之徒亦不能借

乘流之便捷而恣行梟張爾

沈彤震澤縣志熙寧三年郊廩上言古人治低田之法或五里七里而爲一縱浦又七里十里而爲一橫塘因塘浦之土以爲隄岸使塘浦闊深則水流通而不能爲田之害隄岸高厚則田自固而水可必趨于江非專爲闊其塘以決積水也隆興六年李給獻治田三議曰敦本之法要在治田若但知決水而不知治田則所開浚之地不過積土於兩岸之側霖雨蕩滌復入蕩浦不五七年壅塞如舊前功盡棄矣 宏治中史鑑議築隄當於春初編集民夫每圩先築樣墩一爲式高廣各若干尺然後築隄如之其取土皆於附近之田又必督民以杵堅築務令牢固隄旣訖工令民簞泥填灌取土之田必使充滿復於隄之內外增廣其基名爲抵水蓋隄旣高峻無基以培之則歲久必頽矣

南潯志

卷四

河渠

三十一

金友理太湖備攷周永年水利書論水于江北則利在漕論水于江南則利在田欲求水之利先審水之害害在淤塞則利在疏通害在泛溢則利在凇泓而泛溢之病又根於淤塞其要不出蓄洩二字故歲修之計無如深其浜漙高其岸塍如治田之法治水深者益深則流疾而不至上涌高者益高則防峻而不受潰入 震澤縣志水之爲物惟下之趨惟隙之乘諸漙大通則水從諸漙入湖諸漙半通則半從諸漙入湖半從荻塘爛溪等處四散東注從汾湖三泖白蚬江而歸於黃浦

按今日之水勢如此

太湖之水略小耳未必諸漙淤而湖杭諸郡

邑必遭沈溺然諸漚之淤不可不開也此不必責之官而責之民亦不在一時而在平時責之民則惟其所便田可溉而舟可行無餘事矣在平時則歲歲可修潦則置之旱則開之勤曰則置之暇日則開之功無已時利無盡日矣 自大錢以東諸漚港之上流皆從荻塘來荻塘之水初不直下漚港距漚港四五里或二三里又有橫河一道自西而東屈曲以貫漚港之端上承荻塘諸橋港北下之水分入諸漚港以下太湖 震澤縣諸港上流皆自烏程縣界來其在荻塘之北由湯漚等涇來者入境爲泮溪爲南渡船港爲豆腐港東瀕爲虞家漾白田漾西漾又爲蔡家蕩其由荻塘九里六里等橋來者入境爲夜字港雨字港北瀕爲唐蒙漾東爲蔣家漾

王鳳生浙西水利備攷湖州百川叢錯而要以苕霅二溪爲總貫全憑北面漚港歸太湖以爲蓄洩又支分而東由南潯之東塘烏鎮之爛溪而出乎望鶯脰湖故九霞山長云吳興之水不患其源之不通而患其流之不洩凡蘇松興利之處卽

吳興去害之由斯言可謂扼要矣 烏程之水由東塘抵南潯出平望又自東塘支分而注于北塘由北塘屈曲而趨于各漚港歸太湖南潯西柵東柵出水則瀉于北匯橋陸家漾金魚漾自此盤旋而北或縱或橫分注各漚港以歸太湖總核大勢烏程西南二方爲七邑下流之藪惟賴北有太湖以爲蓄洩東由運河而注鶯脰湖東南由爛溪潯水分瀉于秀水震澤故童國泰水利條議云譬諸人身湖郡咽喉也太湖腸胃也入湖諸港壅阻旣多如咽喉抑塞不通則腸胃四肢均受其害若水來西南沙阻東北勢將泛濫橫行旁溢四境爲害可勝言哉

范鍇潯溪紀事詩注

明世宗實錄嘉靖十八年九月丁巳添設

南潯志

卷四

河渠

三十三

浙江湖州府通判一員于烏鎮駐劄主緝捕盜賊兼管治農水利 鄭準開國集宋慶元間袁說友言浙中陂塘漚瀆悉爲田疇水則無地可瀦旱則無水可庠不嚴禁之無復稔歲然則淤水爲田利少害多可見矣 茅氏曰熙寧七年興修兩浙水利議者謂苕霅二水出于天目之山而溢于太湖書曰三江旣入震澤底定今二江並廢獨一松江入海故太湖之水壅而吳興被患遂欲廢北關長安二埭上塘之渠與下塘相通又于餘杭之南湖引苕溪之水達于漕渠穿錢塘之市而入于江以紓吳興之患時多以爲然部使者檄餘杭主簿葛書舉行視書舉以爲吳興之水歸于太湖太湖廣袤四萬八千餘頃旁占數郡其所灌輸非獨苕霅也書稱三江震

澤說者不同就如議者之言則尋常溝瀆之流豈可以比二江之任祇益紛擾耳且錢塘二埭其來久矣大役之興古人所重固執不可議者不能奪其事遂寢故龍圖閣直學士李公常時守吳興聞書舉之說貽書嘉歎部使者亦交薦之今吳之諺曰攤了長安壩沒了吳江港見上港之必不可通下渠也萬曆戊申餘杭南湖堰壞蘇湖俱成大浸撫軍移湖守陳幼學兼治之而定若非葛主簿則湖久爲浸矣按此條可爲妄言妄

作之鑿昔宋邾邾僑父子言三吳水利極詳而沈氏震澤縣志舉其說而條辨之以爲後鑿亦此意也

萬言

曰崇禎元年蔡懋德疏言三吳水利之不興已數十年吳淞江入海故道化爲平陸矣白茅七浦鹽鐵等洩水大川僅存一綫矣止劉家河尙通而泥沙漸淤亦非故迹所以一遇淫

南潯志

卷四

河渠

三十四

霖太湖西來數郡山水奔注蘇松下流無從宣洩數百萬頃良田悉成巨浸夫臣鄉雖居一區財賦半天下況今邊警需餉仰給東南尤爲至急至切及今不治患日甚一日灾稔易乘蠲賑難望小民皮毛俱盡猝有他虞卽國賦將安所從出耶

張丹山潯錄

三吳澤國外鄰江海內迫太湖故吾鄉之旱潦半

視震澤之通塞以爲準南潯北距太湖二十里而近固宜究心水利已故湖州府通判衙門駐劄南潯亦稱鹽漕水利然則運河之淺深漕港之蓄洩是其專責嘗攷明周文襄忱守蘇時崑講圍田築塘立閘旱潦啟閉之法而談鑰吳興志已早言之余少時聞故老傳說直北諸圩皆有夾塘今人皆怠

惰廢弛不復修整一遇旱潦倉皇卹救率皆不及此大病也
愚意以爲今夾塘之有根腳者於春間或水淺時先令鄉人
放蘆傍種楊樹俟其長大繁茂漸灌以土年年幫補久久築
實不數年而成隄矣按張氏爲此說以築隄取土不易也每
見旱年各鄉開濬河港所出之土多患
無堆積處若卽用以築
隄斯真兩得之計矣隄成之後視其圩岸之淺薄者匯角
之孤單者兩面增築水潦時固藉以堵塞而漸幫漸闊樹以
桑枝其利亦溥按或疑隄多則容水之處少恐有礙于蓄洩
不知濬河以培隄隄日濶河亦日深不患其
無所容也再圩之四圍得此藩籬於其進出之口施以水柵設以
閘板旱潦藉以無虞村落因之保守最爲吾鄉水利要務官
斯土者每於冬末春初時出巡行相其高低察其勤惰量爲
獎誘亦未始非古人勸農遺意至于立閘之法大約高者大

南潯志

卷四

河渠

三十五

者仿長興孝豐之制用石尤堅固耐久低者小者仿太湖漚
港之例用木而其立閘之費則照田起派責之田主一切放
蘆種樹填泥幫岸之事責諸佃戶立有成規垂諸永久洵乎
官民並利惠澤無窮矣

徐有珂重濬三十六漚港議浙西杭嘉湖之地眾流交匯萬壑
爭趨喧豖奔騰誠海隅澤國也然西南阻山東鞏海塘數百
里間水無所洩洩之者區區吳淞一口而已而又甚遠中間
所藉以瀦水者則惟太湖而杭嘉湖眾水之趨太湖也必吞
吐於烏程之三十六漚若咽喉然漚西起小梅東盡胡漚皆
在浙境口皆北向鱗排櫛比四十餘里地勢頗高向時深濶
冬令積水不涸今則涸矣其南有橫河一道貫其端河面濶

十丈至二十餘丈不等杭嘉湖眾水之趨湖也必穿此而出
漚 今亦淤矣竊案平地湖郡低於杭嘉而測其河底則湖
郡之三十六漚高於杭之五陵頭塘棲等處及嘉之石門烏
鎮等處並高於歸安之菱湖等處每遇冬令漚 已涸而彼
處猶水深丈餘也然則欲令河底南高北下易於瀉水必重
濬漚港加深尋丈矣同治戊辰己巳官濬深不及尺長不及
漚港三之一如不重濬加深則當霉雨連朝山水奔騰壅決
不得入湖如食遇噎反湧橫吐無所不至而圩田壞矣且杭
嘉湖三郡之水而扼於三十六漚咽喉之地使之倒灌潰溢
廬舍陸沈禾麥糜爛其害民也甚大既大害於民矣而猶復
憚於興作或曰特絀於經費則何不取諸民曰恐擾民耳卽

不擾民而仍恐病民耳夫以開河籌費病民與坐視沈溺病
民其病孰輕孰重耶用就所見私議若干條以備采擇 一
立水則杭嘉湖之水不達錢塘江悉於吳淞口入海而必由
三十六漚下太湖以趨吳淞其他旁竇歧出仍在腹內且紆
遠不通則他處之深徒爲養癰而漚口之淺終如扼吭矣試
飭杭嘉湖境內同限某日某刻測定水則凡遇橋梁石柱平
水處橫泐一畫由此下測得水若干尺卽可知南北河身之
高下矣而三十六漚之淺處見矣大約此後須加深六尺乃
與境內深處平也橋柱由下而上部尺一尺爲一則橫泐十
畫遇水旱勘灾亦有定準水至某則官民灼然共睹遠近卽
可比例是水則之立本前人成法大有益於農政者 一估

土方部尺縱橫一丈深尺爲一方河底不同假令平土開深六尺爲率增減照此乘除可也三十六漚自康熙四十七年雍正八年乾隆八年俱有工程今無可稽惟道光九年開濬在官雖無舊案可查而民間記載尙有刊本計各漚估土十六萬二百二十八方橫河王母來橋至下往橋估土九萬八千五百九十二方各漚又有丈尺段落以今淤淺度之有增無減卽以舊額覈算開深二十六萬方之士以爲受水之地又增二十六萬方之士於圩岸之上以禦水溢卽遇水澇何患其洩之不速何患其溢之不可禦不然如今己巳年之水何以濱湖田圩俱不沈沒而他處皆以倒灌壞也 一權民力精壯農夫竭一日之力早作晚息可開一方有半次者亦

可開一方其上岸卸土自四丈起至十丈止以七丈爲率包工每方須給制錢一百六十文庠水在外器具歸民自備官可省事民亦樂從三十六漚河底土性尙鬆不致困悴築壩庠水亦以包工爲程但須教以用夾壩否則風挾水力無不潰者今己巳年官開每方止給制錢一百四十文庠水在內且實覈挑土不過三萬方而止耳其能通暢乎 一乘天時十月納租事畢十一月築壩動工正月告竣至二月又有事於耕矣三十六漚蠶桑極盛之地二月桑枝放茁必不能興大役也今己巳年官開在三月適逢春雨連綿竭蹶從事而民亦奔走不暇矣 一申官禁凡漁蘆墩大礙水道亟須剷除淨盡不得藉口納稅任其阻撓且蕩稅甚微除之可耳

三十六漚有居民處原無蘆葦其曲折支流自寇亂後已多淤塞叢生雜草小民貪利或幫爲地或放蘆墩故陳漚以東至胡漚各港難通舟卽橫河一道自勝堂橋至下往橋水涸亦無舟路當水盛時河身僅五之一餘皆蘆葦交錯矣漚口向有閘板沿北宋故制數百年來至道光九年閘板齊備由官啟閉額設閘夫屬大錢巡司專管夫役口糧係乾隆間民捐此項今無存矣己巳之開蘆葦依然閘亦不設故無益也一籌工費查江蘇開河近年如瀏河白茆俱係假帑攤徵此攤於田者也若湖郡則不宜攤於田而宜攤於絲其不宜攤於田何也田有正賦寇亂之後田未盡墾履畝未清正賦且不能供何有於攤徵則借帑必爲官累並爲民累此湖郡

情形與江蘇異故不宜也其宜攤於絲何也絲無定價且與外洋貿易而其價半由中國主之湖民之利蠶桑爲最厚絲不得價不售他處不能奪也故近年籌餉善後諸款遞增皆取諸外洋者也此湖郡所獨擅故宜也湖絲極旺時出洋十萬包寇亂後僅三萬包桑少故也每包一千三百二十兩約售洋錢五百元今擬每包抽開河費兩元民間每家所出無幾售得百元者出四角輕而易舉而於大工可立辦每年六萬以三年爲限則十八萬矣且隨時扣除一無延欠獲利本厚一無怨咨不經吏胥一無加耗況此項僱工其錢仍散於民間取諸民散諸民民用其力而農田水旱有備不傷財而陰受其利大有屢慶何憚而不爲哉或曰三十六漚事與湖

郡闔境何與則詰之曰咽喉梗塞與全身無關乎故抽絲捐必合湖屬城鎮抽之也 以上六條重在立水則與籌工費此在事前預謀者餘四條則臨時之事東南財賦之區蘇松嘉湖歲漕數百萬民間農田所入歲且數千萬今以水利未講之故至遇淫雨即成大澇正供既缺民又坐困蘇松之水又自杭嘉湖來而中間以太湖三十六澇爲之梗漚之東即震澤縣境其七十二港形勢略同而不當苕霅之衝其勢稍緩且非浙境故不贅

施國祁志感攘熙曾記旦朝同晏市驚遲日過中覓渡晨

裝殊緩緩還家夜擔更匆匆太湖漚工久圯濁泥塞港口不通

汲諸漚航人泊舟漾口以待入市者每望晨負擔而出迂道至步下船遠或四五里是以爲市日晏歸棹率在昏夜

南潯志

卷四

河渠

三十九

又必轉搬什物燃炬尋路至家農民甚苦之 見愁漚塞津搬苦况忍齋荒水利

空宋胡安定先生泣湖學時曾設水利齋 得似肯庵賢太守李公名堂 重尋二十

七常功案二十七澇名豐登稔熟康寧安樂瑞慶福禧和裕阜通惠澤吉利泰興富足固益濟皆冠以常字

見石柱記箋引湖漚記

沈垚七古一章用愈愚韻贈家柳橋雨多川溢水相觸防

患誰先改突曲兩淮荆湖灾較重饑民形面皆鳩鵠錦江

杭稻足支移千里雲帆轉夔蜀吾鄉地下北濱湖南來苕

水源天目運道所資有荻塘衝處菑石撻以竹近日棚民

墾山地泥鬆和雨下山腹墳塞溝渠患非細人尤凶悍性

不淑湖州以西一帶山近皆棚民墾種尤多植包穀一孝豐人云山多石體石上浮土甚淺包穀最耗地力根

入土深使土不固土鬆遇雨則泥沙隨雨而下種包穀三年則石骨盡露山頭無復有土矣山地無土則不能蓄水

泥隨而下溝渠皆滿水去泥留港底填高五月間梅雨大
至山頭則一瀉靡遺卑下之鄉汎濫成災爲患殊不細山
地價值不多棚民多温處流人初至時以重金啗土人賃
墾山地賃之錢倍於買值以三年爲期土人不知其情往
往貪其利三年期滿棚民又賃墾別山而故所墾處皆石
田不毛矣流人之來益眾則棚益廣西接甯國北至江甯
南且由徽州縣延至江西福建凡山徑險惡之處土人不
能上下者皆棚民占居性凶悍強墾人土或掠人婦女畜
產土人不敢校
官吏不敢詰
下流況又太湖淤菱蘆彌望包山足
南湖面近皆成菱蕩舊時山離南岸二十餘里或三十里
今則自菱蕩盡處至南岸陘處纔四五里湖面淺狹水無
所容害將不可勝言舊時言水利者皆以濬關吳淞江爲
要今則當以關菱蕩爲第一義蓋菱蕩不關吳淞雖濬無
益也
山源不蓄湖復淺汎濫將如癰潰肉水盛齧塘橋久圯
阻斷行途嗟蔀屋烏程縣令議修塘淫流奔放防溪谷斂
錢富民事豈易司役惟君見免俗君本儒者洽見聞冥心
水利搜曾獨勸君努力重下帷膏澤他年霑草木

南潯志

卷四

河渠

四十

汪志按水利之言繁不勝錄今卽舊志并府縣志及鄰
近諸志各摘數條不復泛引雖俱有關於一鎮而不能
專屬之曰以治田之法治水而已雖然昔人有言水利
以蔽水害益烈是又後之
興而水利者所當深長思也
慶雲按兵燹時吾潯屋宇燬去十之九河道爲瓦礫淤
塞旣由義舉公所籌款開浚至光緒十三年因天旱工
程易施北柵里人集資起清風橋訖柵橋及栲栳灣
一帶悉行開浚十二年又集資由便民橋至南安橋一
四年六月大旱南柵里人集資起清風橋訖柵橋及栲栳
律開深廿九年正月自西柵起至東柵止市河一
深旣關水利
附記於此

南潯志卷四終